



## Bahan Sermon Parhalado HKBP Pondok Timur Indah

Selasa, 16 Mei 2017

- |  |                                |
|--|--------------------------------|
| 1. Marende BE No.                      | 7. Marende BE No. 438:2        |
| 2. Votum : A.X.b6 –DVII.30             | 8. Tangiang Pangondianon :     |
| 3. Ep. : <b>Psalmn 66, 8-20</b>        | 9. Marende BE No. 465: 4       |
| 4. <i>Sunggulsunggul</i>               | 10. Tangiang Sian Parjabu :    |
| 5. Marende BE No. 362:1+2              | 11. Ende Pelean BE No. 467:1-2 |
| 6. Jamita : <b>Ulaon Ap. 17, 22-31</b> | 12. Tangiang Panutup           |

### 14. MANOMBA DEBATA NA TUTU

1. **Tung** penginjil na luar biasa do si Paulus. Adong do mandok gumodang do halak ditogu ibana gabe Kristen jala tardidi sian na binahen ni 12 sisean (Apostel) ni Tuhan Jesus i. Ima ala ni masif – bidang ni pangulaoan ni ibana suang songon tolu hali pardalanan pamaritahonna di barita na uli i sahat tu sandok “portibi on”.

Tajom do simalolong ni panghilalaan dohot tondina mamereng setiap kesempatan na nilehon ni Debata laho patuduhon haporseaonna. I do na taida di turpuk on di Athena, Junani do na masa on. Di na paimahon angka donganna (Timoteus dohot Silas) si Paulus disi, diida ibana ma disi godang ganaganaan (patung berhala). Tarbarita do huta on songon kota berhala. Pola didok, ummura do mangalului ganaganaan di Atena sian mangalului jolma. Digoari nasida do i: Debata na so tinanda (unknown god). I ma mambahen gitik (sangat sedih) roha ni si Paulus. Gabe diuji ibana ma patuduhon tu nasida, ise do Debata na sintong. Dipatorang ibana ma i di Areopagus, pusat kebudayaan Junani disi. Tujuan ni ibana ima, asa ditadingkon halak Athena do debatanasida na so tinanda nasida i, alai asa ditanda nasida Sipalua na sintong jala sempurna, na holan di Tuhan Jesus. Ima balga ni holong ni roha ni si Paulus di donganna. Ndang lomo rohana mago di haotoonna halak Athena i. Roha na songon i ma nian ingkon marsigorgor di roha di angka na porsea laho mamaritahon barita na uli.

2. Na mangihut, malo do si Paulus mamillit cara/metode. Tung na bisuk do ibana. Parjolo, dihormati ibana do angka haporseaon na marasing sian haporseaonna (dia menghormati orang yang berbeda kepercayaan dengannya - ay. 22). Diboto ibana do, tung magigi do Debata mida halak sisomba ganaganaan (5 Musa 5, 8-9). Alai, ndang dipaila manang dipalea si Paulus nasida; alai dihormati ibana do haporseaon nasida i. Paduahon, dipake si Paulus do kebutuhan ni natorop i gabe dalam masuk. Diboto ibana do, na mansai lomo rohanasida umbege angka na imbaru (ay. 19-21). Dibaritalion ibana ma tu nasida na imbaru, ima taringot tu Jesus. Paluluhon, dipake ibana do na niantusan nasida (pendengar) gabe jembatan laho mamanghulingi nasida. Dipake ibana do nang pandapot ni angka tokoh-tokoh nasida. Ai didok ibana do di ayat 23: Ai di na mardalani ahu, mamerengi angka sisombaonmuna, gabe jumpang oho ma langganan soda na sinoratan: Tu Debata na so tinanda! Antong, na sinombamona na so tinandamuna, i do no hubaritahon to hamu.

3. Dung i, dipatorang si Paulus ma tu nasida, dia/ ise do Debata na sintong i? *Parjolo*, molo pangantusion ni halak Atena, ia debata i ima Debata sisubuton, ingkon *disogok!* Molo masa sahit, pintor dietongnasida do na tarrimas debata i, gabe ingkon dipele.

I do umbahen didok si Paulus di ayat 25 Ndang hurangan Ibana, umbahen pola sihobasan ni tangan ni jolma. Ibana do tahe mangalehon di sudena hangoluan dohot hosa ro di saluhutna i. Dipatangkas si Paulus tu nasida nang tu hita saonari, ia Debata na sintong, Debata na mora do, mahakaya, sude do ugasanNa. Ndang silehonon alai mangalehon do. Ai di Jakobus 1, 17 didok: “*Saluhutna silehonlehon na danggan, nasa ulibasa na mauiutus, i ma na ro sian ginjang, sian Ama ni na tiur, na so olo muba, na so umboto agia halinu ni hamimimbar*”. Debata na sintong ima Debata na so boi sogokon, Debata na so margantung tu silehonlehon ni jolma do. Molo tapasahat peleanta tu Debata, ndada laho menyogok i manang manghail asa dipasupasu hita. Ndanganal! Alai hamauliateonta do ala naung ditobus hita. Tajaha ma Mazmur 50, 9-12 “Tidak usah Aku mengambil lembu dari rumahmu atau kambing jantan dari kandangmu, sebab punyaKulah segala binatang hutan dan beribu-ribu hewan di gunung. Aku kenal segala burung di udara, dan apa yang bergerak di padang adalah dalam kuasaKu. Jika Aku lapar, tidak usah Kukatakan kepadamu, sebab punyaKulah dunia dan segala isinya”.

*Paduahon*, Mangihuthon pangantusion ni halak Atena, ia debata nasida i boi do dihurung dibagasan sada ganaganaan. Ima umbahen godang dibahen nasida ganaganaan sian hau, batu, tombaga, dna. Ima debata didok nasida, jala disomba. Boasa dibahen songon i? Asa boi dihuaso nasida, asa boi hurungonna holan di nasida jala boi aturonna marguru tu lomona sandiri. Molo songon i, ndang Debata i na gabe debata, alai jolma na mambahen i do! Molo dibahen jolma i ganaganaan sisombaonna, nda sasintongna dirina sandiri do na pinabangkitna gabe debatana jala sisombaonna? Ai ibana do mambahen jala lomona mangatur. Aha ma didok si Paulus taringot tusi? Tajaha ayat 24: la Debata na tumompa hasiangan on ro di saluhut isina, ima Tuhan ni langit dohot tano, ndang maringanan Ibana di angka joro na pinauli ni tangan. la Debatanta Panompa do, ndada na tinompa. Ay. 26a, didok: Sian sada jolma do dipatupa Ibana saluhut bangso ni manisia, asa diingani sisik ni tano on. Marhite i naeng toguon ni si Paulus roha ni halak Atena i sian keyakinan nasida di ganaganaan i tu keyakinan di Debata Sitompa saluhutna i. Asa, Debata na sintong ima Debata na berdaulat penuh, na so boi aturon ni manang aha pe, alai na *mengendalikan* saluhutna jala na adong di saluhut (Omnipresent - Mahahadir). Ai Tondi do Debata (Joh. 4, 23-24). Ndada holan Debata lokal/ luat/ bangso, alai Tuhan ni saluhut do (Rom 3, 29).

4. *Patuluhon*, mangihuthon halak Atena, ia Debata i ima debata na so tinanda. Asal ma dipele, alai ndang diboto manang ise napinelen boha do sifatna, aha naniula, dia lomo dohot sogo ni rohana. Domu tusi dipatorang si Paulus ma di ayat 27-28: Parjolo, ndang dao Debata sian hita on (ay. 27). Ai Tondi do Debata, jadi ada di mana-mana. Psalmen 34, 19 mandok, donok do Debata di angka na bojok marroha (na marsak) dohot di angka na manjou Ibana. Paduahon, “sabangso do hita dohot Debata”. Ai nunga mar-Immanuel Debata dibagasan Jesus Kristus, nunga gabe jolma na maringan ditongatonga ni hita on (Mat. 1, 23; Joh. 1, 14). Di bagasan Jesus ma tangkas jala boi taida Debata. Di bagasan Jesus ma gabe mar-Ama hita tu Debata jala hita gabe angka anak-Na. Di bagasan Jesus ma tatanda lomo dohot sogo ni roha ni Debata. Ima manogu jala manghaporseai Debata na sintong naung jonok tu hita di bagasan Tuhan Jesus.

5. Renungan : Lam tangkas ma hita mananda Debata na tasomba i  
Pokok Doa : Angka ianakhon ni hurianta na mandohoti SBMPTN 2017